

Esther Krättli tar Erica Pedretti

In film da Susanna Fanzun

■ (anr/fa) Erica Pedretti è scriventa ed artista. Ma tgi è questa dunna da 77 onns cun in num grischun, che scriva tudestg e che viva en Svizra franzosa? Esther Krättli ha visità l'autura.

L'ovra dad Erica Pedretti è vegnida onurada cun blers premis internaziunals. Ella è stada l'emprima dunna che ha survegnì l'onn 1999 il premi cultural dal chantun Grischun. «Cunquai che jau saveva che Erica Pedretti è ina da las auturas preferidas dad Esther Krättli hai jau dumandà a la commembra da la redacziun da litteratura dal Radio Rumantsch, sch'ella nun avess veglia da la far ina giada ina visita», descriva la cineasta Susanna Fanzun da la Televisiun Rumantscha co che l'idea per il film è naschida. «Cunquai che jau hai legì tut ils cudeschs da la scriventa Pedretti avev jau bunamain l'impressiun d'enconuscher la persuna davos la scriventa», di Esther Krättli che ha studegià a Turitg romanistica e che lavura dapi l'onn 2000 tar RTR, «perquai sun jau stada intgantada da l'idea da far in film davart Erica Pedretti.» Ella s'ha messa en colliaziun cun la scriventa, la quala è stada pronta da la bivgnantar a chasa a la Neuveville al Lai da Bienna ed er a Schlarigna, nua che la famiglia ha vivì 22 onns.

In'avischinaziun personala

Il film entschaiva cun in viadi cuminaivel en tren da Cuira a Schlarigna. Erica Pedretti entschaiva gia en il tren a responder las dumondas dad Esther Krättli. «En quest med da film en viadi datti spazi er per surpraisas», di Susanna Fanzun che ha accompagnà las duas dunnas



Erica Pedretti dat in'invista personala en sia vita e sia ovra.

FOTO TVR

per filmar lur discurs, «la finamira essenziala dal film nun era da preschentar sia ovra, mabain da s'avischinar a la persuna Erica Pedretti.» Quai las è gartegià bain: La scriventa, per part er ses um, discurre da maniera spontana cun Esther Krättli e la quinta da lur vita. Sco che Susanna

Fanzun tradescha prevesa la TvR da repeter questa sort da «roadmovie litterar» cun Esther Krättli: «Ella sco dunna versada en la litteratura duess visitar scriventas e scrivents ch'ella admira e vuless vegnir ad enconuscher.»

Al team che ha produci il film han fatg

part l'autura Susanna Fanzun en collavuraziun cun Esther Krättli. A la camera era Susanna Fanzun cun il sustegn da Manuel Schüpfer. Per il tagl era respunsabel Manfred Zazzi, la maschaida dal tun ha fatg Not Franziscus, l'ediziun Claudine Cavegn. Ils producents eran Peter Kreiliger e Bernard Bearth.

Datas d'emissiun: Dumengia, ils 16 da december a las 17.25 sin SF 1; mesemna, ils 19 da december da las 08.40 a las 14.00 sin SF info (alternant cun il Kassensturz); sonda, ils 22 da december a las 17.15 sin SF 1; dumengia, ils 23 da december a las 07.40 sin TSI 1.

Stuì mitschar en Svizra

Erica Pedretti-Scheffer è naschida 1930 a Sternberk in Moravia, oz Tschechia. Cun 15 onns sto ella bandunar sia patria. Cun in transport da la Crusch cotschna vegn ella a Turitg tar parents (sia tatta era Svizra). Dal 1946 al 1950 fa Erica la scola d'art per daverentar argentera. Suentar quella scolaziun sto ella emigrar en America nua ch'ella viva per dus onns. L'onn 1952 turna ella en Svizra e marida l'artist Gian Pedretti. Els han tschintg uffants e vivan 22 onns a Schlarigna nua ch'els han anc adina lur segund atelier. Uss viva Erica Pedretti a La Neuveville al Lai da Bienna.